

1857 - Fondo pauperil

Igl onn 1844 vegn in uorden, gl'empren, legius avon alla radunonza da vischnaunca ed approbaus. El scamonda als paupers da spelar fein, da betlegiar las perdanonzas e da catter biemaun da Daniev.

- Las spendas per sustener ils paupers existevan gia daditg. Cun in capital dalla spenda da graun da 1487 francs steva quella instituziun sociala bein.

- La spenda da sal ha schizun in capital da 3063 frs. Cun vender pastiras igl onn 1856 crescha in dils capitals per 2959 frs. Las entradas da dumiec muntan 374 curtaunas. Il sal annual cumprau per la spenda munta 221 curtaunas.

- Las cefras sco era ils suandonts extracts ord protocols da vischnaunca pon dar in maletg da quei sistem ch'ei oz forsa grevs da capir.

- Dapli davart quellas instituziuns ein d'anflar els protocols dil pauperesser sin pagina. 1318.

Fondo pauperil dalla vischnaunca da Tujetsch prius ensemen 1857, il schaner

Fondo pauperil
della Lidula Vischnaunca de Tujetsch prius ensemen
1857 il Gienar.

| | Capital en Daners frs | Graun uer Sal. unty m mof fr | Shems annual frs | Spesas annualas. |
|--|--------------------------------|------------------------------------|------------------------|---------------------|
| Capital della Spenda da Graun | fr 1487:73 | | fr 74:38 | |
| Graun che po vegnir pagau cum Daners muntan 83 a 85 rps la curtauna | | | 70:59 | |
| Graun de Spenda annual curtaunas Dumieg | | 374 454 :2:1 | | |
| Spesas annualas al sign Caplon de Rueros curtaunas 94 | | | | 82 |
| als Caluffers 24 | | | | |
| per trer ils fals 8 | | | | |
| als legaus de Spenda de Graun 16 | | | | |
| Per 2 s. shemas perpetuas ina agli signer Tasser e l'auter agli sign Caplon de Sadrin | | | | fr 3 40 |
| Capital della Spenda da Saal | fr 3063:67 | | 152:18 | |
| Saal de Spenda annual cresas | | 221 | | |
| Gravogias u. Spesas annualas per ina s. shema perpetua da agli sign Tasser. che po vegnir pagada cum fr 85:70 | | | | 7 65 |
| agli sign de Saal fr 6:80 | | | | |
| Agli signer Tasser e als Caluffers Saal, ch'ei augn bucca specificau | | | | |
| Capital fundau 1856 entras vender ora pastiras | fr 2959:71 | | 147:98 | |

Entginas decisiuns dalla radunonza da vischnaunca pervia dils paupers:

1844, ils 28 da matg

Cura che quel ei staus legius, sche ha signur assistent Schmedt, sco president dalla cumissiun pauperila, declarau quei che la cumissiun dils paupers hagi decretau per ils paupers,
- numnadamein da schar spelar fein,
- da buca schar betlegiar las perdanonzas,
- scumandau il cattar biemaun per Daniev,
ed entras ina tscharna approbau.

1855, ils 16 da settember

Plinavon ei da quella concludiu da far in fondo, cun quel segirar ord il capital, ch'ei vegnius stabilius entras las pastiras vendidas e lura sch'il grond basegns damonda, duvrrar il tscheins dil sura detg capital vid manteniment dils paupers, ed en cass ch'ils paupers savessen senza quei tscheins raschuneivlamein vegnir manteni, sch'en gliez cass duei il tscheins uonn e mintg'onn vegnir mess tiel capital e quei capital duei vegnir tenius separaus da tuts auters quens da vischnaunca, aschiditg sco quella vegn a disponer plinavon sur da quei.

14 da schaner 1866

Eis ei vegniu publicau che la cumissiun pauperila da **Tujetsch** hagi tratg neu tuttas pastiras ch'eran dadas als nos paupers per schar cultivar, cun el medem temps far notari a **Sedrun**. Ils paupers che garegian puspei da quellas sorts da pastiras, dueien dar en ad in u l'auter dalla cumissiun pauperila, nua ch'ei sappi puspei da quella cumissiun vegnir partiu ora quellas suenter basegns.

1869, ils 20 da zercladur

Eis ei serrau la **Rufna** da pinar draussa e pli tard schar pinar ils paupers che la cumissiun pauperila decretescha. El medem temps eis ei vegniu dau als paupers ils sequents loghens per schar prender lenna da fiug per siu basegns, ils quals loghens negin po seprofitar da lennas, auter che quels che la cumissiun destinescha cheutier, ils quals dueien star sut curatella da nies „forschner“ (*selvicultur*) ed obedir lur camonds, e quei ein ils suandonts loghens:

1. Odem igl **Uaul Nual**; schar far sut ora las romas e caglias e „Zvergs“. Sco era autras lennas da feglia, ed ha per cunfin quei toc per ils paupers dadora l'aua da **Nual**, sura entochen **Plaun Plirata**, dadens entochen il fistatg entadem **Plaun Plirata** engiu entochen giu **Plaun**.
2. Eis ei dau tuttas lennas da feglia viasi **Tschuppina**, sco era da far sut ora romas e tagliar giu „Zvergs“ e mass ensi entochen la schetga dils mises, ch'ei entochen giudem **Plaun Grond**, engiu tochen tier il stradun, anen vegn schau sura al „farner“ (*selvicultur*).
3. Eis ei dau ora la **Val Bugnei** quei dil maun dadens encunter la **Val Bugnei** engiu tochen tier las schetgas, sco era il **Cugn da Siat Fontaunas**, sco era sisum davos fistatgs.

Eis ei vegniu legiu tgei pastiras da segar dar als paupers, sco era giu **Mila** in toc da cultivar, las qualas la vischnaunca ha approbau da schar controllar el cudisch dils paupers e quei oz e per adina. Sch'ei po vegnir consumau dils paupers, cass cuntrari aber sch'ei vanzass da quellas pastiras, che vegnessen buca segadas treis onns in suenter l'auter, sche po la vischnaunca vender da segar, il pagament aber stat lura alla vischnaunca da salver sezza ni dar en cassa dils paupers, sco ella anfla per bien.



Igl uclaun **Bugnei**, ch'ei segiramein staus da quella grondezia duront la gronda part dil 19avel tschentaner. 13 baghetgs / casas cun la caplutta da s. Giusep e begl enasisum igl uclaun. El nord manca aunc il tagl el crest che succeda entras la construcziun dalla lingia da viafier VFA (Viafier Furca Alpsu). Il trassé fuva finius gl'atun 1913, la viafier en funcziun per igl onn 1926.


Ils 8 fiugs digl onn 1886 a **Bugnei**:

1. Monn Gion Antoni
2. Deragisch Vigeli
3. Deragisch Emanuel
4. Curschellas Johann Anton
5. Jagmet Luis
6. Decurtins Gada
7. Poltera Andreas
8. Deragisch Josef Anton



1858, ils 3 da mars, ha la cumissiun pauperila, cun approbaziun dalla ludeivla vischnaunca, stabiliu la sequenta norma ariguard il pauperesser.

Suenter quellas normas intervegnin nus era ils nums dils paupers ed il diember en mintga vitg. Trentatreis persunas, famiglias, vegnan sustenidas e per quellas valan quellas normas. Per treis onns retscheivan els tocs pastira per saver cultivar. Semnar in tec graun ni forsa truffels era buca pusseivel en quellas altezias dallas pastiras. Ei tunscheva sulettamein per carschentar il fein en clavau cun fein a pastg. Buca dapli. Igl auter devan las spendas. Tenor la gliesta ein era treis statalters necessitai alla beinvulientscha dalla instituziun sociala. Bein en grondas miserias vegnan las endisch dunnas ad esser stadas, vieuas, cun forsa aunc affons minorens, denter quellas ina jastra, ch'ins ha gnanc scret cul num!



1. Duei igl ugau dil sal dar ora quella spenda tenor sco el ha en cassa, seigi en natira da sal. Era duei el cun ils daners che vegn tratg en, cumprar il sal e tenor tabella fixada distribuir quel. Igl ei adina reservau alla cumissiun da tenor basegns engrondir il diember, ni sminuir quel.

2. Dueien tuttas pastiras urbarisadas, schadas allas sequentas famiglias, per aschiditg, sco la cumissiun anfla buca da prender naven, quei s'entelli adina sch'ina u pliras vessen buca basegns, mintgin che gauda, duei tener si e schubergiar ton sco pusseivel.

3. Als sequents ei per treis onns dau da segar ils sequents loghens sco igl ei reparti u dau a mintgin - bein dueien esser obligai d'onn e mintg'onn midar ed en cass ch'ei duessen buca, ni lessen buca segar mintgin, sche pon ei schar nunsegau, negin aber duei ver ils dretgs da segar, sut negina pretext, sonder quei duei restar sulet al fixau per quels treis onns.

Ils paupers da **Rueras** che retscheivan pastiras da segar:
 Giossi Retscheivan il **Tschenghel Ault** perin, quei ch'ei pastg da cauras
 Brugger la **Pala Verda** silla **Pulanera**, quei ei per dus, ils tiarms sco igl onn vargau.
 Tomas Riedi

Tschamut
 Barclamiu Berther Retscheivan enasi **Cuflegl**, entscheiva otier la **Val Liunga** ora amiez engiu quei ch'ei pastg da cauras ed anen tochen
 Vieua Loretz il **Crest da Muschaneras** il pastg da cauras.
 statalter Gion Clau Sievi
 Cresenzia Werth

Selva

Gion Clau Berther
Clau Andriuet

Retscheiva sugl **Iert** sco el vegn.

Surrein

Nesa Giossi
Gion Antoni Quinter

Retscheivan il **Bastu**, nua ch'igl ei plirs onns segau. Dapli ella **Punt Pardatsch**, quei dado la punt sut via.

Cavorgia

Cresenzia Casparin
statalter Giachen Martin Bearth
statalter Sigisbert Monn
Sep Antoni Deplazes

Retscheivan tuts treis la **Paliu dil Varetg**. Dapli enagiu sut la **Cresta**, quels englars.

Bugnei

Giachen Antoni Caneti
Cecilia Riedi
Gieli Sievi

Retscheivan si **Platta Biala**, silla **Val**, anen entochen sil **Crest dalla Pala Quadra** odem e sco quel taglia si e giu, tochen il pastg da biestga ed ensi era.

Sedrun

Madelna
jastra
Mengia Beer
Sep Maria Muggli
Madleina Monn
dunna Giacometa
Onna Maria Beer
Vigeli Monn
Vigeli Beer
Rest Quinter
Vigeli Nagler
Toni Schmet
Francestg Werth
Beer caluster

Retscheivan sco ils onns vargai.

Tschun da quels retscheivan las **Plauncas Tgamus**.

Ils auter treis retscheivan sulet il **Baun Plaunca da Siarps**. Dapli la **Val dils Calusters** ed il **Grep Ault**, tut quei ch'ei pastg da cauras.

Mariuschla Quintra

Retscheiva la **Ruosnetta**




Giu **Las Rueras** ils onns 1930, il **Rein Anteriur** aunc buca curregius

1858 - Accord da caltschina

La caltschina era necessaria per la construcziun dils mirs da casas e da nuegls. La vischnaunca veva quels onns entschiet a sustener ils baghetgs construi cun mir. Ils nuegls vegnevan construii dituttatg cun lenna e quei duorava in mantun, era sch'ins fageva aunc diever dalla lenna dil baghetg precedent ni schiglioc d'in clavau. Cun l'obligaziun da mirs pils nuegls ei vegniu persequitau ina via fetg innovativa. La smanatscha dalla reducziun massiva digl uaul, ha aviert ils egls als Tuatschins.

La caltschina duorava il crap caltschina e quel vegneva avon en gronda dimensiun en Val Nalps, ella vischinonza da Pardatsch da Vaccas, aunc oz numnau leu il Grep da Caltschina. Per temps stevan leu ella Val Caltgera treis fuorns da barschar. La via tochen als fuorns ha giu prioritad da manteniment. Il barschar vegneva surdau a specialists, fuvu la lavour gie buca tec sempl e vitier aunc stentusa! Ei duorava nundetg bia lenna, il vegnir neutier culla crappa e lu survigilar sur in liung temps la barschada.



Accord sur il barschar la caltschina

1858, ils 28 d'uost, ha la ludeivla vischnaunca d'ina vart e Giachen Martin Giger da **Tujetsch** e Barclamiu Gieronimi dil district da **Chiavenna**, vischnaunca da **S. Giacomo**, da l'autra vart.

1. Ein ils surprendiders obligai da far il fuorn entiramein novs e cun la bucca menada anora encunter gl'**Uaul Cavorgia**, e cura ch'igl accord ei finius, duei il fuorn esser en bien stan.
2. Duei ei vegnir dau buna mesira a norma d'otg mesas brels il salmer e las mesas brels dueien esser sufficient grondas, era duei ei vegnir dau caltschina e buca crappa, ni tschendra ni puorla, duess ei resultar ch'ei vegness dau crappa, ni sco sura menziunau, ein ils surprendiders obligai da recensiar al proprietari tenor enconuschientscha dils meisters che lavuran ora ella, ni d'in tierz.
3. Ein ils surprendiders obligai da far ina via oravi sur il fuorn ora egl **Uaul Cavorgia** per rabbitschar en la lenna.
4. Ein ils surprendiders obligai da barschar cura ch'igl ei dau en 80 salmers, seigi lura ina, ni pliras gadas egl onn.
5. Ein ils surprendiders obligai da metter sufficienta cauziun alla vischnaunca.
6. Igl accord duei cuzzar sis onns ed aunc dus onns en remessa dalla vischnaunca.

NB. Davart las breis dueien las duas presentas enferradas ni tschercladas da fier pagar, e quellas dueien ils sorprendiders mintgamai metter en bien guvern e cura che quellas fussen ventschidas, duei vegnir remess autras en campi dalla medema grondezia.

Per las sura obligaziuns empermetta la vischnaunca als sorprendiders en recumpensa per baghegiar il fuorn niev 40 francs. Dapli en recumpensa per far la via, dat la vischnaunca 30 umens, seigi vid la via, ni da far il fuorn, vul dir buca grad dil temps da fenar e quei las otg sil plaz, in'ura vacanza da miezdi e las seras tochen las quater.

Dapli paga scadin 3 frs. il salmer.

Per confirmaziun dil sura, suttascrivan las parts

Tujetsch, ils 28 d'uost 1858

En num dalla vischnaunca, la cumissiun da quella, in per quella,

Giachen Antoni Schmet, gerau

Bartolomeo Gieronimi

Giachen Martin Giger



Fuorn da caltschina ella **Val Caltgera, Pardatsch/Val Nalps**

1861 - Notizia egl urbari da Rueras

Dapi ch'ils da Rueras han giu caplon e quei a partir digl onn 1645, han els era stuiiu segirar e francar entradas e grevezias dil caplon en in urbari.

Il caluster ei adina staus ina persuna ufficiala, quei noda era pader Placi a Spescha, el ch'enconuscheva bein Tujetsch e ch'ei segiramein staus fetg dependents dils calusters cun tut sias activitads ch'el veva sper la baselgia.

La notizia pertuccont il caluster, lai era resortir l'impurtonza da quel. Buca per nuot in tal «contract da lavur».

Anno 1861, ils 19 da mars, ha il vischinadi, en preschientscha da mei suttascet, legiu ora il Giachen Maculin per dus onns caluster, cun la paga da 104 frs., ditgel tschien e quater francs per onn, cun la cundiziun ch'el laschi tut l'otra entrada dalla calustria al vischinadi, e quei tut per applicar tier il benefeci dalla scola, e tier nuot auter, e ch'el, Giachen, stoppi lu orda quei pagar nuot, ni spenda, ni enzatgei auter, sonder, el hagi da treer ils sura 104 frs. blut, per siu survetsch.

Vigilius Venzin, caplon




Il vonn, il plaun principal dalla **Val Tujetsch** (ils ulteriurs dus plauns/vonns che fuorman la **Val Tujetsch** ein quel da **Selva** e lu quel da **Tschamut**). Davontier **Rueras** (buca veseivel **Dieni/Putnengia**), lu suondan **Zarcuns** e **Camischolas**, silsunter **Gonda** e **Sedrun** ed alla fin ed odem, ni all'entschatta dalla val, schai **Bugnei**. El funs il **Rein Anteriur** e beinveseivel co el ha luvrau ora siu vau e formau las spundas dils plauns giu encunter il **Rein**, naven da **Rueras**, **Camischolas** tochen **Sedrun**. Surstar fan las bialas squadras da **Rueras/Zarcuns** e **Camischolas/Gonda** en sia dimensiun e ch'ei, sper igl auter territori, stadas caparra per ina agricultura che ha saviu nutrir ses biebein 900 habitonts dalla val! Pader Baseli Berther suttastreha la posiziun da **Zarcuns/Camischolas** cun metter leu ils rehs e beinstonts purs dalla val!

1861 - Entelgientscha per alps e pastiras

Per mintga alp vegn definau il diember e la specia d'animals. Co ulivar las alps vegn marcau en artechel 7. Ils cavals van sco usitau enta Pardatsch, Val Nalps, ed ils vadials po mintgin metter nua ch'el vul.

Pertuccont il caschar ellas alps la primavera, vegn decidu da praticar sco ils davos 14 onns ed ei vegn precisau: «En quellas ch'ei lura stau lubiu, duei era ussa esser lubiu, aschia ch'otg dis avon cargar, po ei buca vegnir mulschiu e caschau en las alps ch'era avon buca lubiu. Caschar pon ei la primavera a Surpalits, Tgom, Stavelsecs e Strem.

Entelgientscha co guder las alps e pastiras



Sedrun, 1861, ils 16 da mars, ei seradunau ina cumission per sedeliberar co guder il dallas alps e pastiras.

1. Enten **Maighels** ei destinau da cargar stiarls e vadials e zuar il quantum stagiau da 210 tgaus. Schabegia ei onns che la vischnaunca ha paucs stiarls, sche duei ei vegnir cargau mo 200. Quels gaudan l'entira alp da **Maighels**, tut il **Surpalits** entochen enasil lag e gaudan encunter **Tiarms**, naven dil tierm dalla crusch e sco quel fila si encunter la **Gonda dallas Pagnas** e zuar giudem quella; han untgida da neivs oragiu denter l'aua **Nual** e **Val Vadretg**.

2. Sil **Tgom** ei stagiau stiarls ni vadials 90 tgaus, gaudan igl entir **Tgom**; encunter **Pardatsch** entochen enagiu **Palits**. Il **Palits** vegn gudiu cun ils cavals ed ensemen; encunter **Stavelsecs** sco il trutg che va en la **Val dil Run** e zuar sco quel che va grad sulla **Fontauna** en; encunter **Nual** sco l'entira **Val dalla Puzza**, sco il crest u fil oradem il **Munda Femnas** fila giu encunter ina gondetta e tochen giu tier il trutg, aber buca sut quel. Untgida da neivs enagiu **Pardatsch**.

NB 1. Duess ei crescher stiarls en quellas duas alps dil sura stagiau, sche vegn ei augmentau en mintga alp a proporziun dil stagiau. Duess ei calar dil sura stagiau, sche vegn ei cargau enta **Maighels** mo 190 tgaus e sil **Tgom** stat alla ludeivla vischnaunca da metter si auters tiers da quella, ni era prender si tiers jasters e metter sin quella, sco ella anfla per bien.

Quellas duas alps ein unidas q. e. quels ch'ei en in'alp e ston ora in onn cun la sort, sche ston quels buc ora pli tochen che tuts ein buca stai ord quella, era sch'ei stuess vegnir separau ils tiers d'in pursanavel. Era eis ei s'entelgiu che mintgin po metter vadials cun ses stiarls, sch'ei plai, seigi en in'alp ni en l'otra.

NB 2. Mintga particular ha il dretg da prender per ses stiarls alp nua ch'el vul q. e. cun stiarls e vadials e quei mintg'on.

3. **Strem, Val Mila e Caschlè** ei stagiou 160 stiarlas ni genetschas, **Strem** 85 e **Mila** 75. En quellas duas alps po ei vegnir e duei vegnir observau igl uorden dils stiarls ariguard igl ulivar, duess ei crescher en vischnaunca stiarlas dil sura stagiou, sche dueien las stiarlas tonaton mo vegnir en quellas duas alps. Ils da **Strem** han untgida da neiv oragiu la **Gonda Dadens**. Ils da **Mila** ora **Mila** e **Uaul Flurin**, cura ch'ei si **Caschlè** giu gl'**Uaul Flurin**. Schabegiond gronda neiv, da maniera ch'ei san buca grad turnar si **Caschlè** ni ch'ei massen schiglioc buca si pli, sche dueien quels ch'audan en **Mila** ira dalla **Val Mila** en, ils da **Strem** ira tras la pastira da casa da **Camiscolas** tochen en la **Gonda Dadens** e schigleiti sco igl ei terren en **Strem** ira cun las stiarlas ell'alp.

Appartenent tier las genetschas, ha la vischnaunca resalvau ch'en cass ch'ei duessi calar enzatgei da num dil sura quantum dallas stiarlas, sche vegn ei mess en quellas duas vals intontas genetschas e prender quellas ulivamein ord las alps dallas vaccas a proporziun. Quellas gaudan sco igl ei stau ils onns vargai; enten **Mila** tochen o tiels **Druns**. Enten **Strem** gaudan dil maun da **Valtgeva** tochen o la **Gonda da Plaunca Gion Giachen**; dil maun da **Camiscolas** tochen ora tier las **Plauncas Verdas**.

Schabegiond il cass ch'ils da **Strem** ston star sill'untgida plirs dis, sche dueien ei paschentar in di dil maun da **Valtgeva** ed in di dil maun da **Camiscolas**; aber adina paschentar anen encunter l'alp e buca anora.

4. **Val Val** cun **Tiarms** e **Cuolm da Vi** vegn cargau vaccas ed ei stagiou 240 tgaus; gaudan encunter ils stiarls a **Surpalits** duront ch'els ein leu tochen enagiu il tierm dalla crusch e sco quel fila ora si encunter la **Gonda dallas Pagnas**. Suenten ch'ils stiarls van naven da **Surpalits**, sche pon ei guder tochen oragiu dem il **Stavel da Muschaneras** e sco leu fila orasi encunter la sura numnada **Gonda dallas Pagnas**. Encunter **Val Giuv** gaudan quels tochen ora giu **Milez Sut** nomenativamein tochen il **Crap Gries** e sco quel fila vi encunter ils trutgs encunter **Crest da Tiarms** e da leu naven sco quel fila viasi encunter **Stavel dil Bostg** e dil fil dallas **Bostgas** enasi. Sper **Stavel dil Bostg** duei ei vegnir mess en in tierm da dus pursanavels, numnadamein in da **Val Giuv** ed in da **Val Val** e quei tierm duei vegnir mess sin il **Crest** sut la canal, quei tierm duei filar encunter ils fils sco sura stat.

Duront ch'ils da **Val** han ora sil **Cuolm** la caschada, pon ei era guder vi las **Bostgas**, aber buca d'auter temps. Temps da neiv han quellas alps a **Scharinas** e **Milez** en nuegl. Duront ch'ei si **Cuolm da Vi** han ei untgida giu las **Foppas**.

5. **Val Giuv, Culmatsch, Nual** e **Mut** vegn cargau vaccas ed ei stagiou 215 tgaus; gaudan encunter ils da **Val Val** sco ils cunfins dils da **Val** ein determinai; l'entira alp da **Val Giuv**, tut il **Liez**, il **Culmatsch**, l'entira **Plaunca Biala** tochen enasi il trutg che va a **Puzza Pintga**, pon era vegnir cun las vaccas dil trutg en e da sum las **Bostgas** giu cun las caschadas; aber pon vegnir da cheu giu pér suenter quei ch'ils da **Val** ein stai otg dis permanentamein sil **Cuolm**, suenter quei ch'ei vegni giu dils **Cuolms Aults**. Gaudan era tut l'alp da **Nual** e **Mut** ed encunter ils dil **Tgom** sco ils cunfins dil **Tgom** ein determinai. Han untgida giu ils **Plauns Selva** e gaudan encunter la pastira da casa dils da **Selva** sco la partiziuin dallas alps dils stai vargai onns.

6. **Cuolm Cavorgia** e **Stavelsecs** vegn cargau vaccas ed ei stagiou 55; gaudan igl entir **Cuolm** e **Stavelsecs**, ein ils cunfins encunter ils dil **Tgom** sco igl ei determinau ils cunfins dils dil **Tgom**. Untgida enagiu ils **Plauns Pardatsch**, pon era clauder enagiu dil **Cuolm** ils cavals cun far ina seiv cun lattas derschidas.

7. Appartenent igl ulivar las alps, dueien quels che ston ora culla sort ord in'alp l'emprema ulivada, ston per quella partiziuin star en quella nua ch'ei tucan, la secunda ulivada turnar nua ch'ei eran stai, sco igl ei stau usitau quels onns vargai.

8. Enten ils **Pardatschs** vegnan cargai tut ils cavals e gaudan tuts ils **Pardatschs**, sco ils onns vargai. Tgi che tegn buca vacca a casa ed ha basegns d'in cavagl per trer fretg, sche dueien ei puder tener diesch dis, igl emprem per far fein grass e sis dis per trer graun e truffels, aber la notg adina metter en nuegl. Tgi che drova cavals per menar rauba mercantila e sto perquei ira ord vischnaunca, sche pon ei vegnir ord l'alp il di avon, ed il di ch'ei tuornan pon era star quei sez di sin la pastira da casa, aber la notg adina en nuegl. Tgi che cunterfa cun ils cavals el sura appartenent la notg, sche dueien ei stuer pagar als vischins nua ch'ei sattan 50 rps. per notg e sut castitg digl obercheit.

9. Ils vadials po mintgin metter nua ch'el vul e rugalar suenter plascher, aber adina haver exactamein ord praus e buca far pastur sin pastira da casa d'auters vischins, nua ch'el ei buca vischin.

10. Appartenent il caschar en las alps la primavera, dueien star sco ils 14 onns vargai. En quellas ch'ei lura stau lubiu, duei era ussa esser lubiu, aschia ch'otg dis avon cargar, po ei buca vegnir mulschiu e caschau en las alps ch'era avon buca lubiu. Caschar pon ei la primavera a **Surpalits**, **Tgom**, **Stavelsecs** e **Strem**.

11. Las nuorsas dueien vegnir cargadas quater dis avon auters tiers.



Val Bugnei cul mises dalla **Val Dadens**.

1861 - Uorden d'conomia

L'economia essenziala dalla val e suleta, fuva l'agricultura e perquei fuva quella adina puspei sottaposta a novas reglamentaziuns. Dapi 1811, cugl'empreu uorden enconuschent, va ei pil pli pil medem. Midadas radicalas ni tut specialmein innovativas dat ei struschamein.

1. Cura ch'ei vegn bess la tiara sin il funs, duei en mintga vischinadi era vegnir bess in ton sin la pastira da casa e quei mintg'on.

2. Tuttas specias da tiers armentivs u tiers manedels dueien suenter esser fatg mundi ni cura ch'ei vegnan schai ora sin las pastiras, esser sut pastur sufficient entochen ch'ei vegn descargau, oreifer vadials ed anseuls.


3. Aschigleiti sco pusseivel duei ei vegnir mundiau ils praus, silmeins ils s.h. tiers casa e las nuorsas, nua ch'ils pasturs dalla primavera ein obligai da pertgirar quels tiers entochen ch'ei vegn cargau en las alps. Ils cavals han aber negins dretgs da paschentar il funs il temps da primavera.

4. Mintga vischinadi duei haver in sufficient pindrer per mintga specia da tiers e la pindrada ei per mintga tier 1 xr., oreifer ils cavals, per quels ha il pindrer dil di 6 xr. e la notg 12 xr., il qual pagament ei da tscherchar dil patrun dils tiers, oreifer nua ch'igl ei pasturs generals ni caschadas, sche po ei era vegnir tschercau ni encuretq tals. En cass ch'il patrun dil tier vulesse buca pagar la pindrada, sche duei il pindrer encurir agid tier igl obercheit e quel duei assister d'in tal pindrer ed aunc castigiar il tal ch'ei renitents da pagar.

5. Quels ch'ei negligents, laian ira per praus ils s.h. tiers temps da fretg, seigi ch'ei hagian pastur ni buc, ch'ei vegni pindrai ni buc, ein obligai, sch'ei vegnan tschercai da bonificar il donn ed ultra da quei aunc sut castitg digl obercheit.

6. Ils tiers casa dueien da tut temps esser enferrai silmeins cura ch'ei pon far donn, seigi en praus ni pastiras e sur da quei duei era mintga vischinadi haver in agen pindrer e la pindrada per tals tiers buc enferrai ei fixada per l'emprema gada 4 xr. per tier e la secunda gada 8 xr. ed aschia vinavon mintga gada quater ga dapli nua ch'igl ei negligenza u malezia.

7. Cun las cauras la primavera po mintgin ir en ils mises e star leu entochen ch'ei vegn cargau ad alp, gliez medem di ston aber las cauras vegnir a casa e messas sut pastur da casa. Temps da



primavera duei en scadin mises vegnir mess in sufficient pastur sin cauras e tiers casa e teniu exactamein ord ils praus.

8. Cura ch'ei vegen cargau, duei mintga particular haver ils dretgs d'ira cun ils tiers nua ch'igl ei usitau, aber cura ch'ei van atras praus, dueien ei ir ad in ir e buca paschentar. Schabegiond neivs, che las caschadas da **Val Val** e **Val Giuv** stuessen oragiu, pon quellas vegnir da **Sudada** oragiu, da turnar ell'alp aber pon quellas buc ira per ils praus ni da **Sudada**, sondern da **Malamusa** e **Liez** etc., oreifer cura ch'ei fuss fatg il fein da **Sudada** si.




Ina bellezza vesta da **Sudada** anora sil vonn principal dalla val entochen alla stretga da **Garmischeras**. La foto presenta la ladezia dalla val ed ils differentes plauns per la cultivaziun agricola. Las differentas vals, **Val Mila**, **Val Strem**, il **Drun** e la **Val Bugnei** taglian ils plauns. Foto dils onns 1920/1930. A **Dieni** stattan 7 chischners e quei la sminar cons ei deva ell'entira val (80 - 100)! El fons la cuorsa dil **Rein Anteriur** cun la planira ed ils faners da "giu **Las Rueras**".

1861 - Accord culla claustra

La claustra fuvva en miserias finanzialas e quei ha sfurzau ella alla vendita dallas alps feudalas Val Val e Val Giuv alla vischnaunca. Ins secunvegn culla summa da 7650 frs. Sche la vischnaunca desista dil gentar da s. Martin sa ella reducir il prezi per 1000 frs., cass cuntrari paga ella ils 7650 frs. Il contract vegn suttascrèts ils 21 da mars 1861, mo il gentar (auters tschontschan d'ina marena) vegn aunc a fatschentar entgins onns la claustra ed ils vischins da Tujetsch.

Accord fatgs anno 1861 culla claustra appartenent tier il pagar giu igl arvè dallas alps



Cunvenziun

Denter la venerabla claustra da **Mustér** ed ils respectivs geraus dalla ludeivla vischnaunca da **Tujetsch**, ils signurs Hans Giachen Beer, Duri Wenzin e Gion Andriu Berther, ei sut il present datum, cun reserva da mintga vart dalla cumpetenta approbazium, vegniu tier la sequenta entelgientscha:

La ludeivla vischnaunca paga giu il tscheins fier dallas alps **Val Val** e **Val Giuv**, consistent en 600 crenas u 850 funs caschiel grass annuala grevezia alla claustra da **Mustér** cun il capital da 7650 frs., ditgel francs siat melli sistschien tschunconta.

La titulada vischnaunca ha il dretg da trer anavos da quest capital 1000 frs. sch'ella vul desister digl usitau gentar che la titulada claustra dat annual als respectivs signurs da **Tujetsch** la fiasta da s. Martin. En cass ch'ella preferescha da star tier igl usit vegl da retscheiver il gentar, sche paga ella la summa da 7650 francs integra. Il sura capital s'oblighescha la claustra da retscheiver en las ratas sco suonda:

650 frs. sin la fiera matg 1861 senza tscheins per quels 650 francs.

1000 frs. il di da s. Martin 1861, cun metter vitier il tscheins annual digl entir capital.

1862, il di da s. Martin, ed ils sequens onns succesivs, vegn pagau annual capital 1000 frs. cul tscheins digl entir capital existent vitier a 5 % tochen totala liquidaziun dil capital, suenter la quala liquidaziun, la titulada vischnaunca ei sli giada per adina dalla grevezia dils 850 funs caschiel grass.

Mustér, 1861, ils 21 da mars

En confirmaziun dil sura, num dalla venerabla claustra
pader Martin Andreoli administratur
Hans Giachen Beer, geraus
J. A. Berther
Duri Wenzin

Ils suttascrèts en qualidad da liquidatur dalla venerabla claustra da **Mustér** ratificheschan en vertit da lur plenipotenza la sura cunvenziun

Mustér, ils 21 da mars 1861

Joh. Ru. Toggenburg, liquidatur
Christian Decurtins, liquidatur